

ریڈ سی کرائسز ء جہان ء سیاست ء مٹ بوکین جاورال

لہزانکی کمیٹی بی ایس او آزاد

(لہزانکی کمیٹی بی او آزاد ء مدام جُہد ء کوشست ہمیش انت کہ وتی باسک ء کیڈراں ہوار ایدگہ باسمائیں بلوچاں میاں اُستمانی ء ملکی سیاسی جاورال ء بابت ء یک ماہی نبشتانک ء دروشم ء وتی مہلوک ء سرپد ء آشنا بہ کنیں دانکہ اے رد ء ما زانت کُت بہ کنیں کہ ترندی ء گون سیاسی جاورانی مٹ بوگ ء بلوچ جُز ء سیاست ء سر ء چونیں سان ء اثر کپت کُت کنت۔)

پجار:

دنیا ء ہج چوشیں وھدے نہ یتگ کہ آ وھداں سرجمیں دنیا ء ہاموشی بوتگ بزانکہ کجام نہ کجام دروشم ء مدام دنیا ء یک کنڈے ء جنگ جنزگ ء بوتگ ء ہمے کسان مزنیں ہند ء دمگاں چہ چست بوتگیں جنگ پدا دنیا ء تالان بوان بوتگ ء جتائیں ہنداں سر ء شاہ کشتگ؛ باز جاہاں تباہی ء باز جاہاں وتی وتی سوبمندی ء ناکامی بندوک بوتگ انت۔ نبشتکارے گش ایت کہ انسانی بُندپتر ء سرجمیں پُرایمنی ء وھد تہنا 34 سال بوتگ ء اے میان ء دنیا ء جنگ نہ بوگ ء برابر بوتگ بزانکہ دگہ دراہیں انسانی بُندپتر گون جنگ ء بندوک انت۔ مذہب ء تالان کنگ ء پکر داں لیکہ (آئیڈیالوجی) ء تالان کنگ ء داں بیا، یا کہ سیاسی دیدانک (تھیوری) بہ بنت چوشکہ کمیونزم بہ بیت یا کیپیٹلزم گڑا انسان ء مدام جنگ ء را یک مہکمیں شوربندی ء حساب ء زرتگ، دانکہ مروچگیں دنیا ء گیشترین جنگانی درور ء بہ زور گڑا ترا پرایمنی ء جنگ گندگ ء کانت بزانکہ اے جنگ امن جوڑ کنگ ء نام ء بوگ ء انت۔ عراق ء سر ء اے جواز جوڑ کنگ ء بیڑ برگ بیت کہ اے دنیا ء ایمنی ء پہ بیہارے ء ہمیشکہ دگہ جنگ ء بندات کنگ بیت ء اے جنگ داں مروچی ء جنزگ ء انت۔ اے مروچگیں دنیا نہ انت بلکیں گوستگیں ہزاراں سال انسانی بُندپتر انت کہ ہمے وڑ جنزگ ء انت۔ ہمے ڈول ء اگان ڈکٹیئر ء وتی ہند ء وت ء را مہکم کُتگ گڑا کم کم ء آئی ء وتی دَمگ ء پدا دمگ ء چہ در اتگگ ء دنیا ء سرجم ء ہمے رنگیں سان ء اثرے دور دیگ ء جہد ء کُتگ۔ مروچی کہ ما ہمے جنگاں گندگ ء این یا گوستگیں کہ وھداں جنگ بوتگ انت گڑا کجا نہ کجا اے یک ہندے چہ چست بوتگیں

ذہنیت ۽ عملے سبب ۽ سرجم ۽ دنیا ۽ تالان بوتگ ۽ ہم رنگ ۽ جنگ ۽ دُرج روح پہ روح مزن
 بوان ۽ انت۔ انوں کہ ریڈ سی بزآنکہ یمن ۽ تیابدپی سیمسر ۽ انت۔ ریڈ سی کہ دنیا ۽ 25 کساس
 دنیا ۽ بیپار ہم جاہ ۽ چہ روت اود ۽ کہ اے جنگ ہوئی نامیں سلاہبندیں ٹولی ۽ بنا کتگ گڑا
 آئی ۽ پشدر گوں اسرائیل ۽ فلسطین ۽ جنگ ۽ بندوک ۽ انت۔ چوشکہ فلسطین ۽ انوگیں جنگ ۽
 حماس ۽ نوکیں دروشم گندگ پیدا ۽ انت ہمیشکہ ریڈ سی ۽ پاد اتکگیں جنگ ۽ پشدر اسرائیل
 ۽ فلسطین جنگ ۽ انت۔ ہم رنگ ۽ وھدے کہ اسرائیلی جنگ ۽ گپ کیت گڑا آئی ۽ پشت ۽
 اوشتوکیں امریکہ ۽ یورپ گندگ کایت کہ اسرائیل ۽ اے جنگ ۽ پہ فوجی ۽ مالی کمک کنگ ۽
 آنت۔ کجا نہ کجا بزآنکہ اے جنگ کہ مروچی ریڈ سی ۽ بوگ ۽ انت ۽ آئی ۽ سیادی نہ تہنا یمن،
 ہوئی ۽ امریکہ ۽ گوں بندوک انت بلکیں اے ہم گلوبل دنیا ۽ استیں پکر ۽ پشدر ۽ انت کہ مروچی
 ریڈ سی ۽ اے جنگ گندگ بوگ ۽ انت کہ آئی ۽ سیادی پدا گوں یورپ ۽ گلوبل ڈومینسی ۽ پکر
 ۽ ہیال ۽ گوں بندوک ۽ انت۔ وھدے کہ ہوئی ٹولی ۽ گپ کیت گڑا اود ۽ ایران ہم ڈالچار کنگ
 نہ بیت کہ اے ٹولی ۽ جوڑ کنگ، مالی کمک کنگ، ٹریننگ کنگ ۽ لیکھی ہیلکاری ۽ پشت ۽
 ایران ہوار ۽ انت ۽ ایران ۽ ہم ریجنل ڈومینسی ۽ پکر ۽ گوں بندوک ۽ انت کہ یمن ۽ ہوئی آئی ۽
 یک بہرے آنت ۽ اے پکر سرجم ۽ میانی ایشیاء ۽ گندگ بوگ ۽ انت۔ اے نبشتانک ۽ ما جہد کن
 این کہ ریڈ سی ۽ ہوئی، یورپی، امریکی جنگ ۽ آئی ۽ پشدر بزآنکہ اسرائیل ۽ فلسطین جنگ
 (وھدے کہ فلسطین جنگ ۽ نام گرگ بیت گڑا ایشی ۽ سرجمیں سیادی گوں حماس ۽ بندوک
 نہ انت بلکیں حماس 2000 ۽ پد فلسطین جنگ ۽ تہ ۽ نوکیں گل ۽ لیکہ ۽ گوں کیت ۽ مروچی
 فلسطین جنگ ۽ پجار جوڑ بوتگ، فلسطین جنز وتی توک ۽ مزن ۽ پراہ ۽ شاہگان ۽ انت ۽ آئی ۽
 سیادی گوں ایوک ۽ حماس ۽ بندوک نہ انت) ۽ گلوبل ائیپرز ۽ توک ۽ چست بوتگیں جنگی
 جاورال، میانی ایشیاء ۽ مٹ بوکیں جاورال، ریڈ سی ۽ بندش ۽ چہ میاں اُستمانی اکانومی ۽ سر ۽
 سان، ہوئی ۽ آہانی پشدر ۽ ایدگہ تران ۽ سرجم ۽ آرگ ۽ جہد ۽ کن این ۽ گڈسر ۽ اے جاورال
 بلوچ راجی جنز ۽ سر ۽ کپوکیں سان ۽ سر ۽ ہم گپ ۽ ہبر کنگ ۽ جہد بیت۔

ریڈ سی ۽ چہ بوگ ۽ انت؟

ریڈ سی ۽ کرائسز ہما وھد ۽ بندات بیت وھدے نومبر ۽ بنگیچ ۽ ہوئی یاگی کہ آہانی
 پشت ۽ ایران ۽ کمک است داں ریڈ سی ۽ کمرشل شپ ۽ ٹارگٹ کنگ بندات کن آنت۔ ہوثیانی
 گشگ ۽ انت کہ آ ریڈ سی ۽ چہ اسرائیلی گڑاباں (جہازاں) ٹارگٹ کنگ ۽ آنت کہ اسرائیل ماں

فلسطینء بے گناہیں مسلماناں جنگ ء کشگء انت ء تنا وهدی کہ اسرائیل فلسطینء سرء اُرشء بند نہ کنت گڑا اے ارش ہمے وڑء برجاء مان انت۔ ریڈ سیء چہ دنیاہ 30 فیصد اکنامک چست ء ایر بندوک انت کہ آہانی تہء گیس، تیل، آئیل سپلائی ء ہوار ورگ ء وردنی سامانانی برگ ہم ہوار انت۔ ریڈ سیء چہ اے آپی گراب سوئز کینالء چہ در کانت ء یورپء مارکیٹء سر بنت۔ ہوئیانی اُرشء چہ اے وهداں دنیاہ دراہیں اکنامیء سرء سان کپگء انت۔ ایرانء نزدیکیں ملک چین ہم اے اُرشء وش نہ انت چوشکہ آپی گرابانی روگ ء آہگء مستریں راہ انت، دومی انوگیں اکنامک دورء تاگت زانگ بیت گڑا ہمیشیء سببء آہم متاثر بوگء انت۔ ہوئیء چونائیء اے گپ پدر کرتگ کہ آ اسرائیل، امریکہ ء یو کے ء ابید دگہ ہچ ملکء آپی گراباں جنگء نہ انت بلے میاں اُستمانی سیاستء جہگیرانی (نمائندگانی) کشگ انت کہ اے ٹولیء نیمگء چہ دراہیں آپی گراب ٹارگٹ بوگء انت ء اے اُرشء پد شپنگ انڈسٹریء گون بندوکیں کمپنیاں چہ ریڈ سیء جہازانی گوازینگ بند کرتگ۔ وهدے کہ ریڈ سی ء سوئز کینالء راہ بند بہ بنت گڑا ایشیا، ساؤتھ ایشیا ء یورپء مارکیٹ کنگء آپی راہ چہ اپریکہء گوز ایت کہ آسک مزن ء دراج انت، وهد ء تیل ء زرء ہوار آراہء کارمرز کنگء جہانی بیپاریء سرء مزین سان کپ انت۔ دنیاہ اکنامکء سالانہ 12 فیصد کہ آئیء کساس 1 ٹریلین بیپاری ایوکء ریڈ سیء چہ گوزانء روت۔ سپلائیء توکء دیری ء زری ہوالہء گیش بوگء سببء یورپء 7 کمپنیاں گیش چوشکہ Mearsk ء Hapag Lloyd ء وتی کاریل کرتگ انت یا بازیں کمپنیانی کارسک باز متاثر بوتگ انت۔ امریکہ ء یو کے ء نیمگء چہ ہوئیانی اے ارشء پد یمنء توکء بُنجاہ (دارالحکومت) ء ہوار جتائیں ہنداں سدانی کساسء ٹوپ گواری کنگ بوتگ کہ آہانی مکسد ہوئیانی جنگی بودشتاں نزور کنگ انت دانکہ آریڈ سیء توکء جیڑہ پیداک کت مہ کن انت بلے اے اُرشء پد ہم ہوئیانی اُرش برجاء انت۔ ریڈ سیء بندشء چہ ایریٹیا ء ہاسکار مصر سک باز متاثر بوتگ انت چوشکہ آیانی اکنامی گیش گون سوئز کینالء شپنگء گون بندوک بوتگ انت کہ آڈنی کرنسیء چہ ملکء اتکگ انت، ریڈ سیء بند بوگء گون مصرء سکیں مزین تاوانے رستگ۔ ریڈ سیء بند بوگء گون اپریکی ملک سومالیا، ایتوفیا ء کینیا ہم سک باز متاثر بوگء گمان است انت کہ آہانی گندیم روس، یوکرین ء یورپء گون بندوک انت اگاں ریڈ سی ء سوئز کینال ء راہ ء در شپنگء پہ بند بہ بنت گڑا اے ملک کجام ہم وهدء معاشی ڈیفالٹء نیمگء شت کن انت ء ایشیا ء یورپ دوئیں ہنداں ورد ء وراکانی نہادء گیش بوگء ہم چانسز باز است انت۔ انوگء داں گلوبل مارکیٹء ریڈ سیء شپنگء بندشء سببء بلین آف ڈالرزانی نُکسان بوتگ۔ اے اُرش Bab-el-Mandeb زرء کنگ بوگء

أنت کہ چمداں اے گراب دیم پہ سوئز کینال ء رو أنت، اسرائیلی گراباں ہوار یو کے ء امریکہ ء
 ابید یورپ ء بازیں دگہ ملکانی گراب (جہاز) ء کمپنی ہم چہ اے راہ ء روگ ء ترسگ ء أنت کہ اے
 ہوٹی ارش ء زد ء میا أنت ء دنیا ء ایکٹیو ترین اکنامک روٹ کرائسز ء آماچ انت۔ اے روٹ
 ایوک ء ٹریڈ ء کارمرز کنگ نہ بیت بلکیں یورپ ء ایشیا ء را انٹرنیٹ ء سطح ء بندوک کنگ ء
 ہم کیبل تار چہ ریڈ سی ء گوز أنت چوشکہ انوں زوتاں اے ٹارگٹ کنگ بوتگ أنت۔ انٹرنیٹ
 ء 75 فیصد ایشیا ء گوں بندوکی ہمے کیبل اپریٹر ء گوں بستگ کہ اے چہ ریڈ سی ء گوز أنت ء
 Bab-el-Mandeb اداء کہ ہوٹی گراباں ٹارگٹ کنگ ء أنت گڑا اے ہمے جاہ انت کہ اداء زر ء
 جہلی 45 کلومیٹر انت بزانکہ سک جہل نہ انت ء ہوٹی یاگیانی کر ء اے رنگیں تاگت بیت کہ آ
 اے کیبل تار ء تاوان دات بہ کن أنت۔ گیشیں کمپنی ء کہ چہ اے راہ ء وتی بیپاری یلہ
 کرتگ، چوشکہ اے ریڈ سی ء گیشتر کاروبار کنوکیں کمپنی أنت۔ دنیا ء گیس ء 20 فیصد ء تیل
 ء 30 فیصد ہمے راہ ء چہ یورپ ء روت انت، انوں چوشکہ یک نیمگے یورپ کوشست کنگ ء
 انت کہ روس ء دنیا ء جہت ء تہنا بہ کن أنت ء روسی تیل ء آئیل ء کاروبار ء متاثر بہ کن
 انت۔ اے وهداں اے راہ یورپ ء ہاتر ء سک باز مانا دار ایت ء سک ء کسانیں کیمت ء لوٹ
 ایت ہمیشکہ بائیڈن ء سعودی ء دورہ ہم کرتگ ات ء تیل ء Production ء راگیش کنگ ء
 ہم لوٹ کرتگ ات بلے سعودی ء نہ من اتگ۔ اے وهداں کہ یورپ ء را انرجی ء پہ تیل ء
 گیشیں زلورت انت اے وهداں وهدے ریڈ سی ء وڑیں ازرشداریں راہ بند بہ بنت گڑا ایشی ء چہ
 انٹرنیشنل مارکیٹ پرشت ء پرورش بوت کنت۔ انوں یو کے ء ہاسکار کینیڈا معاشی بُنیات ء
 recession ء جاگہ ء سر أنت۔ وهدے کہ ریڈ سی ء کاروبار متاثر بہ بیت گڑا ایشی ء سیادی
 ایوک ء گوں یورپ ء نہ بیت بلکیں دنیا ء معیشت متاثر بوت کنت، چوشکہ چین ء انڈیا ء
 ایسٹ ایشیا ء ساوتہ ایشیا ء مڈل ایسٹ ء گیشیں کاروبار گوں یورپ، نارتہ امریکہ ء آدگہ
 ملکان چہ ہمے راہ ء کیت انت ء ایوک ء تیل ء گیس ناں بلکیں برنج ء بھ ء شَر (Import and
 Export) ء بگر داں کاپی ء بھ ء شَر ء بیا داں درست متاثر بوت کن أنت۔ دنیا ء معاشی راہ
 ہمیش انت کہ آنیمگ ء سالانی سال برپ انت ء کاروبار بوت نہ کنت ہمیشکہ ایشیا، یورپ،
 نارتہ امریکہ، اپریکہ ء مڈل ایسٹ ء کاروبار چہ ہمے راہ ء بندوک انت۔ ہمیشکہ تجزیہ نگارانی
 گشگ انت کہ اگان اے راہ متاثر بوت بزانکہ دنیا چہ کووڈ 19 ء چہ ہم گیشتر متاثر بوت
 کنت۔ ریڈ سی ء چہ پد ہما راہ کہ است أنت آساوتہ اپریکہ ء چہ نارتہ امریکہ ء یورپ ء
 سر بنت، اگان آراہ ء گپ بہ بیت گڑا فیول ء بگر داں ہر چیز روچ روزینی حساب ء ودیت ء
 Good import export ڈیفالٹ ء روت کہ گیشیں ساز ء سامان کہ است أنت آ ہراب

بنت۔ دومی نیمگ ء ہوئیانی گشگ انت کہ تنا وھدیے اسرائیل فلسطین بزآنکہ غزاه ء تہء وتی آپریشن ء بند نہ کنت ہما وھداں داں اسرائیل ،امریکہ ء یوکے ء گوں بندوکیں گراب ٹارگٹ کنگ بنت ۔ آنیمگ ء ما گند این کہ امریکہ ء یوکے ء نیمگ ء یمن ء تہء بازیں اسٹرائیک کنگ بوت کہ آھانی مکسد ہوئیانی ہاموش کنگ ات بلے اے پالیسی ناکام بوت ء ہوئیانی گیش ارش کنگ بندات کت۔ ہمے وڑ ما گند این کہ اسرائیل ء روشنت ء تہء ہم ہچ رنگیں پرک گندگ بوگ ء نہ انت ء غزاه ء تہء آپریشن روچ پہ روچ گیش بوان انت گڑا گمان ہمے است انت کہ اے جنگ داں دیراں جزات کت کنت ء ایشی ء سبب ء سرجمیں سان دنیا ء معیشت ء سرء کپ انت۔ دومی نیمگ ء امریکہ ہم یمن ء توک ء دگہ مپتیں جنگے وتی سرء زورگ ء پہ تیار نہ انت ہمیشکہ کوشست کنگ ء انت کہ آپ گراب ء کاروبار بہ جنزیت۔ اے درگت ء امریکہ ء سروکی ء 20 ملکی Multilateral Coalition ء جوڑ کنگ بوتگ کہ آ آپ گراباں چہ ہوئی یاگیانی ارش ء بہ رکیں انت۔

ہوئی کئے انت ء یمن جنگ چی ہے ؟

ہوئی انسر اللہ ء نام ء ہم زانگ بنت کہ ایشی ء متلب (اللہ ء حمایتی) انت ایران ء پراکسی گروپے کہ یمن ء بنجاہ ء گیشیں دمگاں ایڈمنسٹر کنگ ء انت ء یمن ء توک ء سعودی ء یو اے ای ء پشت ء چہ جنزوکیں یمنی ہکومت ء ہلاپ ء جنگ کنگ ء انت۔ ہوئی مسلمانانی توک ء شعیہ سیکٹ ء توک ء زیدی سیکٹ ء گوں بندوکیں گروپے ء بندات ء اے یمن ء نارتھ ء ہکومت ء کرپشن ء سنی مسلمانانی پیور کنگ ء شعیہ ء ڈالچارکنگ ء بازیں جیڑھانی سرء چست بیت ء پدا میزاں میزاں ء اے گروپ گیش مہکم بیت ء 2011 ء وھدیے کہ یمن ء توک ء سول وار بندات بیت گڑا اے گروپ بنجاہ ء دگہ بازیں دمگاں وتی دستاں کنت۔ چوشکہ یمن ء توک ء شعیہ آبادی کم انت ء ہکومت گیش سنیاںی دست ء بوتگ ء ایران ء اے چیز ایدگہ دمگانی حساب ء لٹ ء پُل کرتگ ء یمن ء توک ء تاگت ء گرگ ء پہ ہوئی شرین رنگے ء سلاہبند کرتگ انت۔ مروچی ہوئی سیاسی ء پوجی تاگتے جوڑ بوتگ کہ آئی ء کرء ڈرون، ہیلی کاپٹر، میزائل ء ایدگہ مزینں کساسے ء سلاہ داتگ۔ چونائی ء ہوئی گروپ ء بندات چہ 1990 ء سادا ء نیمگ ء بیت بلے وھد ء ہمبرائی ء ایرانی کمک ء گوں وتی تاگت ء گیش کنت ء توانائیں تاگتے جوڑ بیت۔ وھدیے کہ یمن ء توک ء عبداللہ صالح ء ہکومت دور دیگ بیت ء بنجاہ ء سرء ہوئی زبردست بنت گڑا سعودی ء یو اے ای گوں Internationally Recognized ء یمنی

ہکومت کہ آئی سیادی گون سنی سیکٹ ء بندوک انت آہانی ہمہرائی ء یمن ء توک ء ہوئیانی ہلاپ ء جنگ بندات کنت کہ آئی ء تہہ ہزارانی کساس ء مردم جنگ ء کشگ بنت ۔ جنگ ہما وهداں گیش بیت وهدے سعودی ء ایران ء نیمگ ء چہ ریجنل ڈومینسی ء پہ پراکسی وار گیش مہکم بیت ء دوئی ملک یکے دومی ء ہلاپ ء ریجن ء تہہ کنٹرول دارگ ء پہ شعیہ ء سنی ء منظم کنگ ء آہاں یکے دومی ء گون میڑینگ بندات کن انت ۔ اے زد ء عراق، شام، یمن ، لبنان ء دگہ بازیں ملکہ کیت انت ۔ اے سول وار انچوش تاوانبار بیت کہ یو این ء یک رپورٹ ء رد ء یمن ء 2/3 فیصد آبادی ء را انسانی کمک ء زلورت بیت ۔ انوں زوتاں سعودی ء گون ہوئیانی سیزفائر ء پہ راہ جوڑ کنگ بوت ء جنگ تنی وهدی اوشت ء آماچ انت ۔ انوگ ء داں ہوئیانی ارشاں چہ سنے Crew Members جنگ بوتگ ء لہتیں ٹپی ء یک جہازے وتی کبزه ء زرتگ ء بازیں دگہ جہازانی سرے ڈرون ارش کنگ بوتگ ۔ ہوئی وت ء امریکہ، اسرائیل ء یورپ ء ہلاپیں گروپے لیکہ کن انت ء وتی اوگامانی تہہ مدام مرگ بات امریکہ ء اسرائیل ء اوگام ء جن انت ۔ ہوئی وت ء اسلام ء فلسطین کاز ء منوگریں گروپے لیکہ انت ء انوں زوتاں کہ ریڈ سی ء تہہ اسرائیلی ء اسرائیل ء گون بندوکیں دراہیں کارگو شپس ء اے واستہ تاوان دیگ ء انت کہ اسرائیل فلسطین ء تہہ وتی آپریشن ء بند بہ کنت ء سیز فائر بہ کنت ۔

اسرائیل ء حماس ء جنگ پرچا بوگ ء انت ؟

چوشکہ انوں گوستگیں سال ء اکتوبر ء وهدے فلسطینی گروپ حماس آپریشن الاقصی ء بندات کنت ء ہزارے گیش اسرائیلی پوجی، شہری ء ایدگہ مردم اسرائیل ء توک ء روت ء کش ایت ء چوشیں سدانی کساس مردمان بندیگ جوڑ کنت گڑا فلسطین ء اسرائیل ء نیمگ ء چہ یک نوکیں جنگ بندات بیت بلے چوناہا ایشی ء بُندپتر سداں سال پیسر است انت، نون بلے روچ پہ روچ اے جنگ ترندتر ہوان انت ۔ حماس آپریشن ء را نون شش ماہ بیت ء ہما انت کہ اسرائیل فلسطین ء سرے ہر روچیگیں بُنیات ء ارش کنگ ء انت ء انوگ ء داں 30 ہزار ء گیش فلسطینی غزاہ پٹی ء تہہ کشگ بوتگ انت کہ آہانی تہہ 4 ہزار ء گیش زہگ انت ۔ اسرائیل ء بمباری ء چہ ہزاراں زالبول، میڈیکل ورکر، شہری ء ایدگہ مردم مُرتگ انت ء اسرائیل ء بمباری انگت جنگ ء انت ۔ اے جنگ ء تہہ اسرائیل ء را امریکہ ء ایدگہ یورپی ملکانی سپورٹ سرجم ء گون انت ء یوکے ء امریکہ ء ہوار بازیں دگہ یورپی ملکہ اسرائیل ء

جنگی کمک ء مدت کنگ ء انت بلے دومی نیمگ ء فلسطینیان ورگ ء پہ نان نیست، بجلی نیست، لوگ ء جاگہ چہ بمب ء توپاں تباہ بوتگ انت ء گیش مردم اقوام متحدہ ء نیمگ ء چہ جوڑ بوتگین کیمپانی توک ء نندوک انت کہ ادء ہم اسرائیلی پوج بمباری کنگ ء انت۔ چونائیء اسرائیلء گشگ انت کہ اے جنگ حماس ء ہلاس کنگ ء پہ بوگ ء انت کہ باندا پدا چوشیں آپریشن ء جنگ اسرائیل ء ہلاپ ء مہ بیت بلے ہرچیز کہ میدیا ء گندگ پیداک انت آ گیش لس مہلوک ء جنگ ء کشگ انت کہ برجم انت۔ نادراہجاہاں بگر داں یواین ء نیمگ ء چہ جوڑ بوتگین کیمپ اسرائیلی بمباری ء چہ ہج رنگیں جاگہ پش نہ کپتگ ء دومی نیمگ ء ڈنی ملکاں چہ آؤکیں کمک ہم بند کنگ بوتگ انت کہ یو این ء وتی رپورٹ ء تہء ہمے گمان پدر کرتگ کہ اگاں اے کمک فلسطین ء سر نہ بوت انت گڑا لکھانی حساب ء فلسطینی چہ گزن ء مر انت ء دومی نیمگ ء امریکہ ء یورپ چہ اسرائیل ء لوٹ کنگ ء انت کہ آکمک ء فلسطین ء روگ ء بل ایت بلے اسرائیل انوں اے رنگیں ہج لوٹاں کمار کنگ ء نہ انت۔ ما ادء اسرائیل فلسطین جنگ ء ہمیشکہ تران ء باوست کنگ ء این کہ ہوٹیاں ریڈ سی ء سرء اے ارش کرتگ انت ء کرائسز جوڑ بوتگ آئیء سبب اسرائیل ء حماس ء میان ء جنگ انت۔ ہوٹیاں گشگ انت کہ کجام روچ ء کہ اسرائیل فلسطین ء سرء بمبارٹمنٹء ہلاس کنت ء جنگ ء سیزفائر بیت ہوٹی وتی ارش ء بند کن انت بزآنکہ تنا وھدیء داں اسرائیل فلسطین ء سرء ارشء برجہاہ دار ایت گڑا ریڈ سی ء اسرائیلی ء اسرائیل ء گوں بندوکیں گرابء ایدگہ چست ء ایر بند کنگ بنت۔

فلسطین اسرائیل جنگ انوگین جنگ نہ انت بلکین گوستگین 100 سال ء برزیں جنگ کہ مروچیء داں ہم وتی ہلاسی ء سر نہ بوتگ۔ مروچی ء چہ 100 سال پیش انگریز جنرل Arthus Balfour انگریز ہکومت ء 67 لہزء نمدی ے نبشتہ گت ء گشت کہ فلسطین ء تہء یہودی کمیوٹی ء ہاترء لوگ بزآنکہ جاگہے جوڑ کنگ ء زلورت انت ء برطانیہ یہودی ء اے ردء کمک بہ کنت، اے نمدی پدا Balfour Declaration ء نام ء زانگ بیت۔ برطانیہ کہ اے وھداں یہودی ء فلسطین ء ملکہ ء سوگندء کن انت گڑا اے وھداں فلسطین ء 90 فیصد آبادی فلسطینی عرب مسلمانی بیت۔ 2023 ء بگر داں 1947 ء تک برطانیہ فلسطین ء توک ء یہودی آبادکاری ء کمک ء مدت کنت ء ہاسکار وھدے کہ دومی جہانی جنگ کہ بندات بیت ء ہٹلر یورپ ء توک ء یہودیانی ہلاپ ء مہکمیں جنگ بندات کنت گڑا اے وھداں فلسطین ء تہء یہودی آبادکاری لکھانی حساب ء بیت کہ اے فلسطینی ء ترسء آماچ کنت۔ ہمے رنگیں سوگندے اولی جہانی جنگ ء وھد ء گوں فلسطینی مہلوکاں ہم برطانیہ کنت کہ وھدے آ

جرمنی ء شکست دینت گڑا فلسطین ء آزاتی دیگ بیت ء آہانی ریاستے جوڑ کنگ بیت - بلے زورگیرے ء دروشم ء برطانیہ دنیا ء ایدگہ دمگانی وڑے فلسطینی مہلوک ء رد دنت ء باپشت ء یہودی ء گون معاہدہ کنت کہ آہاں ریاست جوڑ کنگ ء دیگ بیت دانکہ دنیا ء یہودیانی سپورٹ برطانیہ ء بہ رسیت۔ اولی جہانی جنگ ء باج برگ ء پد فلسطینی چہ ریاست ء زبہر کنگ بنت ء فلسطین ء توک ء یہودی آبادکاری بندات بیت کہ دومی جہانی جنگ ء پد فلسطین یہودی، فلسطینی عرب ء برطانیہ ء میان ء جنگ ء میدانے جوڑ بیت ء برطانیہ چوشکہ دومی جہانی جنگ ء پد معاشی ء پوجی ہوالہ ء نزور بیت گڑا فلسطین ء یلہ کنت ء اے مانگیش اتگیں جاوراں فلسطین ء اسرائیل ء جیڑہ ء یو این ء ہوالہ ء کنت۔ اقوام متحدہ ء نیمگ ء چہ دو ریاستی توجیلے پیش کنگ بیت کہ اے پارٹیشن فلان ء توک ء فلسطینی مردمانی زمین 55 فیصد یہودیانی ہوالہ ء کنگ بیت کہ چد ء پیسر آیوک ء 6 فیصد زمین ء سرء آباد بوتگ انت فلسطینی مہلوکاں اے گپ قبول نہ بیت ء اولی اسرائیلی ء فلسطینی جنگ بندات بیت کہ چریشی ء چہ لکھاں فلسطینی چہ وتی ہند ء دمگاں در آہگ ء لاچار بنت ء اے جنگ ء اسرائیل باج بارت کہ چریشی ء چہ یہودی فلسطین ء 78 فیصد سرء کبزہ کن انت ء فلسطینی مہلوکانی ہاترے 22 فیصد پشت کپ ایت کہ اے پدا غزا ہ پٹی ء ویسٹ بینک ء نام ء زانگ بنت ء کساس 7 لکھ 50 ہزار فلسطینی چہ وتی لوگ ء جاگہاں چہ گلینگ ء درانڈیہ بوگ ء لاچار کنگ بنت۔ 5 جون 1967 ء عرب ملکانی پوج ء اسرائیل ء میان ء شش روجی جنگے بیت کہ اسرائیل پدا سوبمند بیت ء ویسٹ بینک ء سرء کبزہ کنت ء ایشی ء ہوار مصر، اردن ء دمگ ء ہم ، چریشی ء پد اے دمگاں ہم یہودی آبادکاری بندات کنگ بیت۔ ویسٹ بینک ء سرء پدا اسرائیل گون مصر ء گون معاہدہ کنگ ء پد وتی کبزہ ء ہلاس کنت بلے ویسٹ بینک ء وتی سٹلمنٹ ء برجم داریت۔ اے وهداں داں پی ایل او ء وجود دیم ء کیت ء پدا آئی ء سیاسی فرنٹ فتح دیم ء کیت ء فلسطین ء ترجمان بیت بلے فتح ء سافت بیانیہ ء سبب ء 1987 ء وهد ء حماس دیم ء کیت ء فلسطینی مہلوک ء تہ ء زوت پاپولریٹی گپت ء 2004 ء فلسطین ء الیکشن ء کٹ ایت ء غزاہ پٹی ء ہکومتی ء بندات کنت ء فتح ویسٹ بینک کہ آہم 60 فیصد اسرائیل ء کنٹرول ء انت کسان مزنیں آبادی ء ہکومت کنگ ء انت۔ 7 اکتوبر ء اسرائیل ء ہلاپ ء چست بوتگیں جنگ 1917 ء برطانوی جنرل ء نیمگ ء چہ فلسطین زمین ء یہودی ریاستے جوڑ کنگ ء پروفوزل ء گون بندوک انت کہ آئی ء سبب ء مروچی لکھانی حساب ء مردم جنگ ء کشگ بوتگ انت ء دیمترے اے جنگ گیش تباہی ء سبب جوڑ بوت کنت۔

ریڈ سی ۽ بندش ۽ اے جاوراں میاں اُستمانی اکنامی ۽ سر۽ سان:

جہازانی دیری ۽ سبب ۽ جرمنی، بیلجیم ۽ کینیڈا ۽ ہوار بازیں یورپی ملکاں چہ کمپنیانی بند بوگ بندات بوگ ۽ آنت پرچا کہ گیشیں ساز ۽ سامان ایشیا ۽ چہ یورپ ۽ کاینٹ ۽ ریڈ سی ۽ توک ۽ ہوئیانی ارشاں پد بازیں آپی گراباں ریڈ سی ۽ وت رو ۽ آ بند کرتگ ۽ وتی راہ مٹ کرتگ چریشی ۽ چہ 10 روچ ۽ سفر نوں 25 روچ ۽ سفر ۽ توک ۽ مٹ بوتگ ۽ بازیں ساز ۽ سامانانی قیمت ہم گیش بوتگ کہ جہازانی تیل ۽ ہوار دراہیں خرچہ گوستگین ۽ چہ ڈبل بوتگ آنت۔ ہمے رنگ ۽ امریکہ ۽ چہ کورٹ ۽ چپلانی سپلائنگ ۽ تہ ۽ ہم نیزوری اتگگ کہ چریشی ۽ چہ مارکیٹ نزور تر ا تگ آنت ۽ گراک چہ مارکیٹ ۽ دلپروش بوگ ۽ آنت۔ چینکس گیش وھد اے کرائسز جنزیت ہمینکس گیش دنیا ۽ تہ ۽ اکنامک جیڑہ گیش ہوان کن انت۔ ہمے رنگ ۽ آپی گرابانی سر۽ سپر ہم دو ہمینچو گیش بوتگ، ہمے سپر کہ پیسر۽ چہ یورپ داں ایشیا 2 ہزار ڈالر ۽ بوتگ نوں 5 ہزار ڈالر ۽ چہ برز بوتگ ہمے رنگ ۽ ہمے کموڈیٹیز کہ یورپ ۽ سپلائی بوگ ۽ آنت یا یورپ ۽ چہ ایشیا ۽ سپلائی بوگ ۽ آنت ایشانی قیمت ہم دو ہمینچو گیش بوگ ۽ گمان آنت ۽ ایشی ۽ سان تہنا یک ملکہ ۽ سر۽ نہ کپ آنت بلکہیں دراہیں ملکانی یک وڑ۽ کپ آنت پرچا کہ گلوبل ٹریڈ انچو یکے دومی ۽ گوں بندوک آنت کہ اگاں یک ملکہ تاوان ۽ توک ۽ آنت گڑا ایشی ۽ سان المی ۽ دومی ملکانی سر۽ کپ آنت۔ چین کہ ایران ۽ نزدیکیں ملکہ زانگ بیت ہم ہوئیانی ارش ۽ چہ وتی ناراضگی ۽ پد کرتگ پرچا کہ چین گلوبل دنیا ۽ شپنگ انڈسٹری ۽ مستر آنت ۽ دومی نیمگ ۽ دنیا ۽ چینی ساز ۽ سامان گیش ایمپورٹ بوگ ۽ آنت بزانکہ انوگیں معاشی دور۽ چین یورپی مارکیٹ ۽ مسترین کلاڈیاں چہ یکے ۽ ریڈ سی ۽ متاثر بوگ ۽ چہ چین ۽ گلوبل اکنامک ڈومینسی ہم متاثر بوت کنت۔ ہمے وڑ عرب ۽ OIC ملک کہ دنیا ۽ تیل سپلائی کن آنت ۽ گیشیں عرب ملکانی آمدنی ۽ گیشیں وسیلہ گوں ایوک ۽ تیل ۽ بندوک آنت اگاں تیل ۽ سپلائی ۽ توک ۽ جیڑہ چست بوت گڑا ایشی ۽ سان اوپیک ۽ دراہیں ملکانی سر۽ کپ آنت۔ ریڈ سی ۽ سوئز کینال ۽ بند بوگ ۽ نکسان تہنا یورپی مارکیٹ ۽ امریکن مارکیٹاں نہ بنت بلکہیں دراہیں مارکیٹ ایشی ۽ نکسانانی آماچ بنت چوشکہ گلوبل مارکیٹ کجا نہ کجا یکے دومی ۽ گوں بندوک آنت۔ انڈیا کہ آ دنیا ۽ 30 فیصد برنج ایمپورٹر آنت ریڈ سی ۽ بندش ۽ سبب ۽ آئی ۽ اکنامی سک ۽ باز متاثر بوت کنت۔ میاں اُستمانی معیشت انچیں اژداری عملے کہ دنیا ۽ مزن ۽ چہ مسترین جنگ ۽ وھداں ہم معاشی ایکٹیویٹی

برجم دارگ بوگ ۽ جھد کنگ بوتگ أنت پرچا کہ اگان گلوبل معیشت نکسان ۽ توک ۽ شت بزائکہ انسان دراہیں گزن ۽ شد ۽ آماچ بنت پمیشکہ مروچی چین ۽ دنیا ۽ تہ ۽ وتی ڈومینسی ۽ واستہ معیشت ۽ لائن زرتگ کہ درستان چہ گیش سانمند انت۔ یو این ۽ رپورٹ ۽ رد ۽ ہوثیانی ارش ۽ ریڈ سی ۽ بندش ۽ سبب ۽ دنیا ۽ تہ ۽ فوڈ سیکورٹی ۽ جیڑہ بندات بوت کنت بزائکہ وردن کم بوت کنت کہ آئی سان دنیا ۽ گیشترین ملکانی سر ۽ کپت کنت۔ ہما انت کہ روس ۽ یوکرین ۽ سر ۽ ارش کرتگ یورپ ۽ روس ۽ چہ تیل ۽ گیس ۽ ہوار بازیں معاشی بندوکی (Economic Dependency) ہلاس کنگ ۽ کوشست کرتگ بلے انوگیں ریڈ سی کرائسز ۽ چہ دومی ملکاں ہوار یورپ باز متاثر بوت کنت کہ پیسر ۽ چہ روس ۽ یوکرین جنگ ۽ غزا ۽ تہ ۽ اسرائیلی جنگ ۽ بیوار کرتگ انت۔ یورپ ۽ تہ ۽ وتی جیڑہ ہم چست ہوان انت ۽ انوگیں ٹرپ ۽ اے کمپین گیش امریکہ ۽ توک ۽ سپورٹ گرگ ۽ انت کہ ما یوکرین ۽ مپت ۽ زر دیگ ۽ این، اگان ریڈ سی کرائسز ۽ چہ امریکہ ۽ ویسٹرن ملک معاشی بُنیات ۽ سک باز متاثر بوت انت گرا گمان است کہ بازیں ملکہ تہی جیڑہ وتی سر ۽ چست بہ کنت انت، انچوشکہ ما برطانیہ ۽ امریکہ ۽ لس مہلوک ۽ نیمگ ۽ چہ گہگیری یے گندگ بوگ ۽ انت۔ گلوبل ٹریڈ انچیں چیزے کہ آئی نپ ۽ سیت گون ہرچ ملک ۽ بندوک انت۔

آسر:

ہما انت کہ یوکرین ۽ سر ۽ روس ۽ ارش کرتگ یورپ ۽ پدا مڈل ایسٹ ۽ سر چست بوتگیں جنگ ۽ اے گپ ثابت کرتگ کہ اے پریٹیکولر ایشو ۽ سر ۽ جنگ نہ انت بلکیں دو لیکہ ۽ میانی جنگ کہ یک نیمگ یورپ اوشتاتگ ۽ وتی ایلوز ۽ دنیا ۽ را وتی نیمگ ۽ چہ داتگیں مانا ۽ من ۽ مراد ۽ حساب ۽ جنزینگ لوٹگ ۽ انت ۽ یک نیمگ گلوبل ساؤتہ بزائکہ یورپ ۽ چہ ڈن ۽ ملک انت کہ آوتی نپ ۽ سیاسی لوٹانی سر ۽ جیڑگ ۽ انت۔ ہرچ چست بوتگیں جنگ ۽ توک ۽ دو ڈومین ۽ پاور بندوک انت کہ یک بلاک ۽ یورپ ۽ امریکہ ۽ یک بلاک ۽ دومی دنیا انت کہ کجا نہ کجا ویسٹرن بندشانی آماچ انت۔ ریڈ سی ۽ انوگیں کرائسز ہم ہمے بُنیات ۽ دیم ۽ اتگ انت کہ فلسطین ۽ اسرائیل جنگ کنگ ۽ انت۔ اسرائیل ۽ پشت ۽ ما امریکہ، یورپ ۽ ایدگہ ملکاں گند این وھدے کہ یورپ ۽ چہ ابید دومی دنیا ۽ نیمگ ۽ چہ ما فلسطین ۽ واستہ توانائیں سپورٹے گندگ ۽ این کہ آ اسرائیل ۽ ہلاپ انت۔ ہوٹی کہ فلسطین ۽ چہ دور یمن ۽ توک ۽ بندوک انت بلے فلسطین ۽ جنگ ۽ کنگ لوٹگ ۽ انت ۽ انچو امریکہ اسرائیل ۽ را مالی ۽

پوجی کمک دیگ ء آئی ء جنگ ء مہکم کنگ ء انت پرچا کہ اسرائیل مڈل ایسٹ ء توک ء یورپ ء امریکہ ء مزین اتحادی ے کہ آئی ء نپ ء سیت گون ویسٹ ء بندوک انت۔ یوکرین ء روس ء پدا اسرائیل ء فلسطین ء یمن ء مڈل ء تہ ء جنگ ء آہگ ء گون تجزیہ نگار انچو گشگ ء انت کہ گمان است اے جنگ دیمترے مستر بہ بیت ء ایشی ء توک ء دگہ ملک ہم ہوار بوت کن انت چوشکہ عراق ء لبنان ء توک ء ایران ء گون نزیکین ٹولیانی نیمگ ء اسرائیل ء امریکہ بیس ٹارگٹ کنگ بوتگ انت گمان است انت کہ دیمترے خلیج ء ایدگہ جاگہاں ہم نوکیں ویل وتی سراں چست بہ کن انت۔ اے جاوراں بلوچ جُنز ء قیادت ء لوٹ ایت کہ آدنیا ء توک ء راجی جنز ء ہوالہ ء وتی لابینگ ء گیش مہکم بہ کنت ء پارٹنرانی نیمگ ء بہ رو انت۔ بلے اے گپ راست انت کہ دنیا ء ہج ملک نزورین تاگتاں گون یکجہتی نہ کنت بلکیں یکجاہ بوگ ء واستہ ہم تئی کرے مزین زور ء تاگتے بہ بیت ۔ ما کہ اے ریجن ء نندوک این گڑا اے ریڈ سی ء گون نزیک انت ء دومی اے ریجن ء تہ ء مزین وئیل دنیا ء را لاجار کنگ ء انت کہ آ اے نیمگ ء نوکیں ء مہکم ترین پارٹنرانی نیمگ ء بہ رو انت۔ اگاں بلوچ جُنز وت ء گیش منظم ء مہکم بہ کنت ء دنیا ء تاگتاں گون اتحاد کنگ ء قابل جوڑ بہ بیت گڑا انوگیں سیاسی جاور انچوش است انت کہ دنیا ء گون بلوچ وتی ء اے ریجن ء نپانی ہاترے گہترین ء مہکمیں سیادی ے جوڑ کنگ ء نیمگ ء بہ روت انت۔

ہلاس